


李文節集

二十一之二十一

志銘



漢書門類			
一〇五	一七八	一〇六	一〇七
冊	架	函	號

內閣文庫			
三五	一〇五	一〇六	一〇七
函	冊	架	號

內閣文庫	
番號	漢 10518
冊數	14 (10)
函號	317 142



李文節集卷之二十

淺草文庫

晉江九我李廷機著

志銘

明故光祿大夫柱國少傅兼太子太傅禮部

尚書武英殿大學士期齋呂公墓志銘

萬曆丁亥六月甲子光祿大夫柱國少傅兼太子

太傅禮部尚書武英殿大學士餘姚期齋呂公卒


于家計聞 上為輟一日朝 詔所司議卹典諭

祭九壇遣官營塋贈太傅謚文安廕一孫中書舍

人蓋 上篤於耆舊而厚其終若是公既以萬曆

某年月日葬於蘭風鄉之姜山與其夫人合而公
之子某等孫吏部主事某廼持沈少宰所為狀來
請余志公墓而銘焉按狀公諱本字汝立其先宋
太師中書令端御史中丞誨誨孫億居新昌八傳
貴義始居餘姚貴義生德玉 高皇帝時新定籍以
聲訛為李三傳而為公瓊公珍公珍生懋後公瓊
懋生改為公父公既極貴當封三代而 肅皇帝
以孝錫類今為人後者得封其本生父母公用者
碩至推及於本生曾祖於是贈公瓊公珍懋改俱
少保兼太子太傅禮部尚書武英殿大學士而瓊

配蔡珍配潘懋配胡復改配楊贈封俱一品夫人
隆慶三年公始疏復姓呂而公初號南渠晚更號
期齋學者遂稱為期齋先生云公以弘治甲子六
月朔楊太夫人夢日墮而生公公生二十五年為
嘉靖戊子舉于鄉越四年壬辰第進士初選庶吉
士不預 肅皇閱卷見有彌封不密者疑而報罷
更覆試得二十一人公預焉甲午授翰林院簡討
戊戌稍遷南國子司業乙巳改右中允視南院篆
丙午改左中允戊申遷南祭酒尋改北巳酉內閣
請益置輔廷推冢宰聞公淵南冢宰張公治少宰



徐公階南大司馬韓公邦奇少宗伯歐陽公德及
公而六 肅皇甚愍慎 旨十日不下而密跡六
人者履素云何逮十一日始 特簡張公治及公
以公爲少詹事兼學士入閣辦事庚戌進吏部右
侍郎兼東閣大學士辛亥進禮部尚書兼官如故
甲寅進太子太保直文淵閣丙辰冢宰缺 命公
掌吏部事錄兩京部寺科道及在外督撫等官分
爲三等以上次其去留尋進少保直武英殿丁巳
考滿進太子太傅庚申再考滿進少傅辛酉五月
太夫人卒于邸 賜公馳驛歸先後歷官三十年

官史局四五年而司業南雍者八年正講席序定
單別修惰絕倖謁所育材以千計分校乙未禮闈
典順天庚午試典丙辰會試稱得士其在內閣若
庚戌面陳禦虜之策虜退乞掩埋蠲卹以收人心
乞整飭營兵以善後圖若因 上問考察及虜情
而言大臣去留之重本兵須廷推風霾之異宜急
備虜若駁侯鸞出邊兵於外載構自隨聽兵掠稼
之請若斥互市決戰守之策若更定戎政若因徐
邳大水請議賑議漕渠若議築外城一面若對邊
兵入衛若條光祿四費 上皆嘉納施行而其大

者 肅皇諱言儲實以巳酉春事難之公請如禮
臣議蚤定及二王冠婚 上欲令出府公言留內
便保護且儲貳未定而居外將令人心跼危繼又
自以建儲請繼又因 上罪郭希顏建帝立儲之
說密奏 上萬壽無疆而小臣稱建帝歿固當顧
其請二王一任京一之國語亦當省且 上嘗謂
天倫之序默定已久第鑒巳酉事愛元良不欲冊
耳誠因其序而或留或遣卽未冊亦可於是 上
大悟命景府之國卒建元良光啓隆萬太平公積
誠感動之功多焉蓋公自爲吉士 肅皇嘗問李

文康公諸吉士誰可大用者文康以公對當是時
肅皇已識公名及典順天試所命題禮樂征伐自
天子出稱 上旨而公所爲錄文 上大善而字
標之自前後典試所未嘗有及其繇成均超拜以
少詹乘馬百僚避路則自 孝廟謝文正以後而
有公及公以後而未嘗有其以少詹與恩榮宴分
宜擬公坐三品上 上特改坐二品之末俾得上
坐示優禮則有宴以來所未嘗有其以內閣攝吏
部分別大臣去留則自公以前政地所未嘗有他
如遣分獻 南郊者四饗地者二祭帝社稷者六

李文節公集卷之三
四
顓命祀先師者六時 賜養羊上尊兼金文綺飛
魚鱗鱗衣服不可勝計至以文臣得 賜奴則又
前後諸臣所未嘗有蓋 肅皇所眷顧倚任公者
優厚篤摯人臣無兩而公亦自以受 明主特達
之知殫忠竭誠以天下爲己任卽與壬人共事左
機右宰而公用孤誠居間同不害正異不傷物中
若觚而不迂外若規而不隨一龍一蛇默劑潛幹
以陰收碩果之功而天下受其賜及公旣歸猶自
以大臣受恩深不當以江湖忘魏闕遇大慶則修
賀遇大典則修助而 上亦念之至殷每輔臣闕

必言呂某可而無有爲之從與者廼公亦已泊然
與世忘矣獨其平生繫情桑梓不少置自居政地
時以餘姚數中倭而姚江以南無城令餘姚人疏
於朝請爲城如江之北初有譁者及城成乃大德
公尸祝公如龍山而其里居若丈田若僱役皆公
力主其議始行一方終廼爲諸路式所謂仁人之
利溥哉萬曆癸未公年八十 上命有司存問予
月米歲夫達尊曠儀海內人艷之越四年而公歿
年八十四夏夫人先公一年歿側室朱氏傅氏傅
平王氏京師王氏生子男六女三孫男二十有二

李文簡集卷之三
五
女十曾孫男四曾孫女一公平居無疾言遽色遇
人無少長貴賤折節下之不修邈於人尤好施予
其繩束子弟減獲斬斬有法餘姚稱之無間言按
謚法兆民寧賴曰安和好不爭曰安若公恂恂抑
抑飲人以和進而施澤於寰區退而爲德於丘里
真所謂安者已所著有期齋集奏謝稿館閣漫錄
行於世銘曰姚川泱泱發祥名碩厥有文正再
登宰席文安踵武鳳采麟姿簡在肅皇特達殊
知拔自司成爰立作礪夢傳卜呂千載合契摹謀
帷幄衡鏡衣冠忠謹屢陳元良卒安眷豈不殷情

則難奪辭闕居廬車懸輶脫言言崇墉公昔成
之秩秩良法公歸贊之民不病徕里不虞寇庚桑
生存畏壘俎豆舊德遐壽完節令名胤祚昌熾恩
數哀榮姜山之陽有封翼翼于千百年公神所息

雲南按察司副使賜山許公墓志銘

公諱天琦字大正其先世有許稷者舉唐貞元進
士賜告歸讀書清源山中因顏其讀書處曰賜恩
今爲賜恩巖而公號賜山不怠祖也至我明有
教諭公進進生綸綸生斐斐生廷斌爲公祖斌生
元臯爲公父以公貴賤贈行人司行人娶丘氏應

天府府丞有崑姑也公孩幼多奇童弗補邑諸生博涉六籍子史秦漢諸書每遇督學使者郡邑試所爲制義卽已迥然至其立論射策日暮晷促鯁生寔儒腹罄意索閣筆束手而公方神思勇溢攬來颺至盈楮累牘閱肆蒼蔚江河決而彝鼎列公目無諸生卽諸生人人憚屈之督學使者急欲廩公而會邑學未有缺則使食廩德化德化科目故寥簡公以爲不足振起其羽翮則又歸晉江歸幾年爲嘉靖壬子舉于鄉又十年壬戌成進士癸亥授行人某年以父憂去隆慶元年丁卯復除行人

戊辰選工科給事中巡視庫廠庫廠故中貴人窟穴不可問往視者至取簿籍涉筆署名而已間佞與爭者徒令氣息蕩然無救於蠹公巡視多所釐革顧不爲壯頰容嘗言曰此曹如獸鹿可馴毋令挺而走險若斥以爲刀鋸刑餘刻核未至必有不肖之心應之已已元夕有詔爲鰲山市燈費當四十萬公力贊其署長疏止之疏出公手又嘗疏海防四事其轉刑科給事中疏刑名弊源六事具報可旣而疏劾兩廣總督其人倚奧援中公而會當路有宿憾公者乃出公廣東叅議備兵惠州惠之

歸善故二十五里亡其六矣而供億不可省則併
責之十九里亡日衆公至極意節約更定賦徭令
邑吏招徠亡者而是時寇發方用兵將吏貪功往
往掩不辜以張級民不歿寇而歿兵公當紀功則
嚴勅諸將吏毋敢踵前習故齊民得按堵寇薄長
樂城閉公開門入民而令郊外急刈稍寇旣無所
得食而畏懷公威德迺隔水相率棄刃羅拜乞爲
良民公曰必歸而俘於是所歸男女數千口悉廉
其籍遣之潮朱良寶者故賊魁撫有年矣爲憲巡
激復叛督撫檄公未至而憲巡僞爲公令招寶寶

曰是殆非許公令俟公至卽自歸言所以叛非得
已今公在焉敢不聽蓋公有功德於惠潮甚大而
公亦自謙以爲不負所學在粵一行也旣調貴陽
年餘擢滇憲副備金騰兵金騰多雜夷公至以化
誨爲務日進諸生講學羣民庶立鄉約俾相訓迪
俗稍稍變方四閱月而嬰疾遂不起矣公有至性
自少小就外傅食於外母孺人日給食錢僅僅耳
公約食積錢若干還爲母製服丘孺人臨終猶不
忘曰孺子之製也其喪丘孺人與行人公盡禮其
墳在某山者公偕計時實手治之葺賜恩巖宇歲

齊文節集卷三
祀唐進士公稷其中族有譜家有訓嘗言吾於兄弟切切惻惻而朋友則怡怡然公性方嚴無所狎昵絕不爲人干請其爲給諫時某子介鄉嫗持八百金爲壽公叱去之平生獨喜說書講易多自得箋註外一時學者以爲指南自其爲諸生偕計吏以至成進士待次天官行人之邸讀禮之廬仕之所至南越黔中貴陽之間英髦秀士爭慕響臻執經請業屢滿戶外公講解開析字稱句品人人皆自以虛往實歸所著有四書周易管見續宋史斷行于世云公生正德庚辰十一月初四日卒萬曆

甲戌十二月初五日年五十五公子某等卜兆賜恩山之原其葬公爲萬曆某年月日而以叅知黃公狀徵銘于史某史某曰余已已在京師公蓋遣二子于明于時稟學云余每見公說書講易發前人所未發給諫議論老成識大體不尚沽激其操行斤斤檢柙外不錯寸趾也卽旣貴嗇陋涼約蕭然故諸生時一絹袍十八年循及紱而被之冬月語余曰兒曹卧麻幙藉草室人爲號寒夫兒也能世以絮藉哉余迄今感其言時爲室人誦之今里中家統而人綺矣余益悼公之不存也銘曰許

氏之先自李唐甲第清源初破荒賜恩精舍臥人
龍含輝剗采餘善慶後有耳孫振宗祊黃門給事
皂其囊出叅藩翰南越中單車尺檄掃欒捨爬痒
起瘡還流亾功緒連殊仕不颺徘徊羅施與鬼方
闕逢閣茂沈幽光轉帷來復愴道旁青烏爲卜賜
山陽是孫是祖賁相望豹藏猶自留文章千秋共
德仰羔羊

廣西梧州府知府槐江丁公暨配封安人張

氏墓志銘

公諱自申字明岳號槐江其先世姑蘇人始祖曰

慎以宋咸淳間自姑蘇徙泉州家文山里自是爲
泉州人其後曰善者迺自文山徙陳江遂世家陳
江善之孫曰全爲郡諸生生三子其季曰懌號後
吾娶於張生公有異質自少好讀古書爲諸生試
輒屈其耦嘉靖己酉舉于鄉庚戌舉進士觀政工
部奉使視垣江西卽不入垣人獻遺江西人重之
反報授南京工部營繕司主事是爲歲癸丑主事
三年秩滿封父懌如其官母張安人戊午遷虞衡
司郎中會鑄錢公筦鑄錢事事竣予俸一等辛酉
權守四川順慶公至順慶問民所苦皆言苦稅急

公與立期會迂其限覈戶口逃亾者除之俗好訟捕逮獄繫多瘦死公至則開釋疑滯獄廼爲虛有吏家亡券僞爲印章將以識券未果用而所親入見而盜用之事覺俱論死公曰造者不用用者不造奈何斃兩人從末減壬戌旱公爲民步禱而爲文禳城隍之神三日大雨時未及稔民饑公設法賑之全活無筭有饑民告糴於富姻閉弗予怒以數十人夜劫取其粟執之官當劫盜公曰其姻也况閉之糴是固可貫遂不傳罪而令秋稔倍輸之粟兩家大感服去土有宣撫司長倅交爭聞于朝

檄順慶保寧二守訊之酋懼以爲將誅已陳兵自衛保寧守請以兵往公曰無益祇令有駭心廼單車抵壁門酋知公無傷害意皆撤兵冠帶出謁公曰吾奉命按若若罪人當以囚服見酋惶恐易囚服叩首謝罪事遂平無何大竹盜起有司者憂之公知主簿李宗明材能召授方畧不旬日悉擒羣盜上其功部使者進簿秩留鎮撫焉爲浮橋於郡前以便渡者爲廟祀漢將軍紀信郡俗未冠而納婦公諭以男女之別婚姻之時更移詞其鄉大夫爲之勸率俗廼稍稍變加意庠序時集郡邑博

士弟子講藝課業而敬禮其鄉大夫之賢者如任忠齋先生雅負高節有司罕得見其面公獨時時造請任先生亦爲公屈交相重也居順慶幾年調守梧州梧州僻左異時者官市於民率責辦牙儈予半直而牙儈乘爲姦利所予民十不能二三民苦之公至廼盡更其弊而是時方大剽徭寇軍吏多掩平民爲功俘至公以俘徧示土人有妻子來識者得放還所活平民以若干計居梧州又歲餘乞終養上官固留之有叅政某子甲來監梧令太守入謁毋得從吏人欲以示威重公曰吾備位二

千石安能手牘趨公門局趣如掾史吾去耳請益力亾何而母夫人之計至公痛向者投効弗果不及母夫人一日之養而又自念以不能與時俯仰所至寡諧而封公年九十高矣遂絕意仕進服闕有中之者亦竟落職公生平無他嗜好獨篤於書及仕留都益多購古文奇帙載之兼兩所至自隨旣歸爲樓數楹顏曰希鄴藏書其中杜門掃軌日取藏書讀之其所爲文詞若干卷世傳三陵稿是也丁氏族指甚衆公爲修譜立規歲時伏臘會于祠堂勸以孝友嫺睦而暇則與鄉長老爲佚老會

具雞糝相過驩謔嬉遊一切內外事不問而公亦賴有張安人安人自年十八歸公公夜誦則安人操女紅須公誦罷廼已公時有所著作安人見其搦筆沈思潛卻步退而性莊潔所居日再汛掃盂必屢滌衣必屢澣食必手調而後進日令僮子矚諸郎學舍有燕僻立譴不少貸即從公宦游所服猶多嫁時衣貴爲安人一翟冠儉弗具也安人歿三年而公亦歿爲萬曆癸未六月某日得年五十有八先是公子日造等卜兆於惠安十八都石船山而以歲之弗利未葬也至是己丑日近君成進

士待次乃移疾歸以是冬某月日奉公安人厝焉而君爲余所舉士與會稽陶君某爲同年君廼屬陶君狀公及安人而乞志銘於史某史某曰余自童齒誦愧江先生制義博瞻典重博士家宗之晚廼見所爲三陵稿蓋吾郡中先輩士大夫田居讀書慕古以著作自命遵巖王先生而後惠安李抑齋先生同安洪芳洲先生而先生相繼起其酷嗜書博購多藏無如先生者至其居官守郡振救平反庶幾乎仁心爲質者乎其食報於其後人宜矣銘曰 鑿之圓而柄則方豹之隱而文則章有媛

孔臧石舟之陽二壁同藏爾後則昌

平陽府通判龍溪馬公墓志銘

公諱斯徂字正謀別號龍溪姓馬氏蓋漢伏波將軍裔世居山西洪洞縣元末有祖名伯川者避亂居禹州自是爲禹州人伯川生獻獻生志剛志剛生榮榮生二子長文麟太學士知江浦江陰二縣有惠政是爲公會祖次吏部尚書端肅公文升爲名臣是爲公會叔祖文麟生玟封御史贈九江知府爲公祖玟生紀正德丁丑進士知雄縣擢御史出爲九江知府岷州兵備副使浙江叅政所至以

清直著聲爲公父配連氏封孺人爲公母連孺人者今御史小嵩少嵩二公姑也生三子長斯臧嘉靖庚戌進士官至順天府府丞次斯才庠生次卽公生雄縣邸中方姪時連孺人有異夢及其生而叅政公以卓異徵至都門而粹都下諸公持羊酒賀雙喜公弱卽屹然有巨人志五歲能誦詩九歲能屬文叅政公心奇之以是爲吾家駒也守九江時爲延名士教公公學日益進迺自九江歸娶於高爲大學士中玄公女弟娶之明年補郡弟子員嘉靖己酉以書經舉省試第八上春官報罷發憤

閉室取舊業理之顧亦不售亦益不懈太學士公
再起以相君攝冢宰事人謂王陽在位此貢生彈
冠時也公意則不欲以戚姬仕且念母孺人老日
侍左右昵猶嬰孩不忍一日離膝下久之孺人卒
而公子計部君亦成進士人謂公雅不屈今子復
貴迺肯謁銓乎公意又不然就選得判平陽府公
欣然之官素廉居官益踴踴循介諸爲判者率局
趣不振溺其職公獨著風裁履畝覈糧無龠合隱
漏每鞫讞有所入出民輒詫謂神君而公實寬然
長者不輕以鞭筆加民民畏而愛之郡守丞若倅

見公賢且素聞馬氏家聲莫不推服稱譽而守蔣
公尤重公闔郡之稅六州三十九縣約五十餘萬
悉以委之公爲盡釐宿弊而稍寬其追比小民戶
相慶聚頌誦公蔣守咲謂公曰將無陽城復見乎
公爲具道家世清白先訓具在在後之侗罔敢失
墜聽者莫不灑然兩臺使者廉公賢他郡邑每有
偵按必以屬公公所至廉辦其視篆蒲州甚有德
也潞村鹺堤淫潦崩潰鹺臺使者先後檄公繕葺
公荒度拮据巡行勞來間扶其不勉無敢怨者費

縮而力舒長堤復完。雖計賴在平陽三年。滿其考
凡于旌至郡者。皆知郡有賢。倅薦剡獎。檄爭借以
爲重。平陽士民愛公恒恐。一夕遷去。不能長有公。
而公亦雅與士民相安。意不忘竟。所樹立不意中。
暑濕遂不起。卒于解州。公署平陽人爲之流涕云。
公孝友篤摯。居喪不飲酒。不談笑。平生不以非義
假人人。以義規。卽慨然樂受。自領鄉書家居三十
年。清約潔修。絕不以私干州郡。及其判郡。人亦無
敢干以私者。而性顧樂施。州里有貧不能瘞鰥。不
能室者。多待命於公。公十一治生。十五施予其助。

新 聖廟葺古寺及津梁道路之費。又時居其二
三人。謂公將無虞損橐乎。公咲曰。吾志固樂爲之。
益吾橐而損吾志。吾不樂也。公生於正德辛巳五
月二日。卒於萬曆戊子七月六日。得年六十八。子
一。卽計部君。愨。計部君以某年某月某日。塋公西
山祖塋之次。而持僉憲李公所爲狀。徵銘於不佞。
某不佞與計部君同舉。癸未進士。於公年家子也。
無所辭。爰論次之。而系以銘曰。 姻貴而不仕。爲
非義也。子貴而仕。欲行其志也。平陽蒲坂。留遺愛。
端蕭家風。爾曷媿大雄之巔。巳亥位。玄宮楚楚安。

且闕藏其中者今循吏知不知乎余銘視

封文林郎興化府推官復庵祝先生墓志銘

祝先生衢州龍游人也其先婺源人後徙江郎山後廼徙龍游始居龍游者曰子進以賢雄於郡稱甲乙子進生四子第三子曰某冠帶散官某生某義官某生二子長曰璋歲薦入太學璋生三子第三子曰允娶於某生三子長卽先生先生名啓元字景仁初號棠山後更復庵先生之生爲弘治乙丑十月二十六日自幼奇警書過目能成誦弱冠補邑諸生試輒屈其耦一日試有司而邑博士雅

善先生索所試破題欲爲先生地先生不授也陽應曰忘之矣其識趣如此先生數舉數不合卒老諸生而後以子比部君貴封今官云比部君之推莆郡迎先生郡邸間聞拷訊退必問其所繇比部君具對如狀意始解且誠曰昔朱邑不以笞辱加物袁安未嘗鞠人贓罪筆楚之下何求不得孺子念之比部君治行高得比部人不爲嚙先生語君曰古人委吏乘田期于盡職比部官不薄患不稱耳人謂祝先生教子義甚高而先生匪獨能教也其內行故淳備多足述者先生父與伯氏有違言

伯也暴拔其髮盈握父櫛之先生一日啓櫛見髮泣持而踞諍兄弟懿親卽小忿何至藏宿櫛此何爲父感其言燬髮遂和好如初先生與伯氏子同學昵甚不以父故有所間郟也喪其父母哀毀踰禮伏臘忌諱猶哽咽不自勝三兄弟故同食旣而食指繁家落謀析著先生痛爲不舉案者索日卽析矣一果一蔬必與諸季共不共不旨也先娶周周歿有里孀饒而艷或以爲可居一日諸父大叅曉溪公語次及之先生正色曰父不聞娶失節以配身猶已失節乎大叅公遽謝曰卓哉子之志吾

姑試子爾蓋越四載而始娶璩孺人舉比部君兄弟云性坦夷不設城府邑俗故多珥筆探丸以雀角鼠牙相勝先生獨夙以禮讓宗戚里間不相得往往賴先生居間卽有齟齬不較也顏所居堂曰集義居恒服用之具稍鮮麗輒不樂惟浣濯漫漶者則甚安近焉史某曰語有之良弓之子必善爲箕良冶之子必善爲裘諺云胡荻不結瓜菽根不產麻故蘇明允布衣以文雄而軾轍顯于定國決疑平法本于公今祝先生重仁襲義薦葦其學樹而獲之祝而肖之豈偶也哉先生於堪輿星卜之

學靡不窺祖父宅北悉先生所相度尤嗜書史校
讎往往達丙夜辰起盥櫛肅謁家廟卽手一編至
于老不輟其在莆陽有饋海蛤者作文蛤賦莆人
傳誦之自莆歸幾年萬曆己丑年八十五歲歿歿
之日正月二十三日也比部君將以萬曆某年某
月日葬先生于某山負某楫某而先期以狀徵銘
于史某某與比部君庚午同舉于畿省於先生爲
年家子誼不可辭迺按狀爲誌而系之銘銘曰
力田不逢後必有豐天道猶張弓于其子不干其
躬封之隆隆樹之芄芄時維祝先生之宮

扶風驛丞怙山張君墓志銘

張君名天緒號怙山世居蔚州其父曰珍娶于葛
而生君繼娶馮生天繡君生七日而母見背育於
葛氏比長不爲後母所憐屏逐于外者十年所迨
父沒君還而季悉有其父貲且傲甚數憑陵君君
顧善視季不幾微見顏色君以貧故從賈某姻戚
與共貲行貨乾沒子母錢無算更宣言以爲君攫
其有也人咸爲君張目君竟寘不較人以故益多
君君壯年爲從史旣迺丞扶風驛有馬頭君得其
不法事榜笞之卒爲所中其爲丞歸乃更貧於向

爲賈時獨杜門課其子在中學在中以丙子薦于鄉人謂君得意時而君不戾念曩所與鄰者也蓋君終其身事馮氏人不知其爲後母視天繡人不知其爲異母弟報其母王父母如母其怨有不讎而德無不報其天性然矣君生於嘉靖元年八月初七日卒於萬曆十六年八月二十六日享年六十有七配劉氏先君六年卒葬城東某鄉在中以十七年某月某日奉君之喪與劉合而遣蒼頭持其友人喬君所爲狀來京師請銘於李子在中蓋自乙酉自蔚州來從李子請業曰父命也在中潛沈向學其與余游語不及他事余心重之一日從容詢其家父母妻子四人蒼頭一人婢一人在中入京師卒業太學携一蒼頭來家僅一婢而令所僦屋一人代汲余以此嘉在中澹泊而君能教也爲之銘銘曰不知其孝視其母不知其教視其子不知其人視予誅

封安人許母丘氏墓志銘

封安人許母丘氏者封承德郎南京禮部主事許公惕吾之配廷評君鼎臣少叅君鼎卿母也少叅君初仕南京禮部主事會今上覃恩封父惕吾

公如其官母丘氏安人安人父曰丘某母曰某氏以嘉靖甲申八月二十四日生安人安人生而慧自少小負志丘父謂是女當貴勿以灼凡兒爲相攸得承德公字馬年十八歸承德公越二年承德公游郡庠始爲博士弟子家四壁立二尊人年垂垂老矣而有季弟尚孺承德公歲授生徒脩脯廩厘不足以更費日居宿外塾一切晨昏饋養之事悉委安人安人左拮右据黽勉有亾孝養二尊人必具修醴卽某氏姑性嚴難事安人顧事事當姑意驩其心其撫季氏至勝冠授室衣食百需靡有缺後卽承德公友于不啻也承德公旣無內顧益得壹意攻書爲生徒講解訓誘承德公業益進郡中人士負笈從承德公游者日益多而承德公數奇困不得志後乃病目倚席不講弟子亦漸散去家食指日繁二尊人見承德公窘于給而季子壯大欲分異之以稍寬承德公承德公弗忍顧安人安人曰奈何以窘故別疎季氏竟弗折也待季及姒滋益周人謂陳戶牖之嫂媿歿矣而二尊人以是愈驩謂是婦也賢必有報迺安人亦不以承德公落落自摧沮曰是薦是菘必有豐年意者孺子

其當之比歲庚午廷評君舉于鄉越丙子丁丑少
叅君連舉進士是年承德公及安人受封無何承
德公歿越癸未廷評君又舉進士蓋郡中棣鄂聯
第者不能數家又每缺不完而許氏伯仲競爽母
安人康彊少叅廷評爭迎養不能得則歲時遣使
起居安人獨與二少子處里中太君高年者亦往
往攝衽從安人安人誕辰則諸太君畢來爲壽安
人命二少子出酒食徇饗諸太君諸太君固皆福
澤乃又各內遜安人里中人望安人以爲瑤池上
人也而安人性慈仁其待諸媳甚和卽有過從容
誨諭未嘗呵斥下至臧獲率善視之時時問其衣
食聞人窮苦卽酸辛涕洟其調困賑乏內而姑姊
姻媿外而閭媿巷媪有所勾貸不顧羸絀竭蹶應
之於是里中人又咸謂安人慈悲樂施西方人也
安人素健少疾一疾遂不起是爲萬曆庚寅七月
初一日距生年六十有七承德公以萬曆某年葬
縣黃坂山至是某年月日廷評君等奉安人喪啓
承德公窆合焉而先是廷評君聞計京邸史某造
弔君泣而以狀請曰子其爲吾母銘銘曰 閨閣
女孺丈夫志厥耦猶屯胤迺熾輿有板方食有旨

李文節集卷三
太君慈仁享宜備黃阪之原蔚且蒼莫莫夜臺雙
壁闕史氏系詩揚其懿絲哉邈哉斯不沐

張母陳淑人墓志銘代

張母陳淑人者禮部侍郎兼翰林院學士張明成
之母也學士父曰賀仕爲光祿寺大官署署丞累
贈通議大夫禮部右侍郎兼翰林院侍讀學士祖
曰元春仕爲梧州太守與陳方伯奎相友善而方
伯子冠爲工部郎中郎中有女甚穎幼卽能誦孝
經內則列女傳方伯公每出讌雖夜分拱候以爲
常方伯公憐之特爲相攸見太守子有奇表遂字

馬年十八歸贈公方太淑人之歸也人謂太淑人
貴介宜不任爲婦而太淑人更婉嫵多能少言事
江淑人與贈公所生母尤淑人兩姑者各得其意
在娣姒間居弱處後遼遼如也於是臬內外咸稱
少婦賢及江淑人喪贈公伯仲析居且有年太淑
人盡出奩中裝佐喪費而是時尤淑人亦已春秋
高贈公遊南雍累舉不得志顧尚不忘圖南也太
淑人從容說曰及親而仕三釜而樂夫人子所以
顯親亦多路矣且孺子幸可教薦菘待豐何不可
焉贈公感其言謁選授光祿丞以歸太淑人與贈

公朝夕事尤淑人盡驩歿而喪盡禮其課督學士
伯仲務引于正經及學士成進士官翰林贈公卽
世獨迎太淑人于京邸甲戌乞假以太淑人歸乙
亥 召補經筵日講官又以太淑人往其轉南京
司業則又以太淑人南學士中遭擠抑既起符丞
太淑人復就養遂爲國子祭酒爲詹事掌院事爲
侍郎教習庶吉士遂蒙 恩封三代一日學士休
沐太淑人謂學士物忌多取 主恩不易酬無亦
惟是進退禮義勉持末路無隕越爲 天子羞亦
所以報也學士以病四疏乞歸歸之明年戊子復

蒙 召學士再疏辭又明年己丑而太淑人亾太
淑人雅好內典自贈公在時日相與焚香誦黃庭
金剛諸卷輒有所悟入故其冲虛止足之意有以
佐學士於詘信進退之間而以其爲女爲婦生長
縉紳家更通達曉大義自學士在 講筵讀講開
發能當上心數蒙賜賚則時時勉學士報稱學士
所居傍長安葺爲似樓時奉太淑人登登而望見
官闕未嘗不斂衽肅容祝 聖人萬壽也太淑人
在閨閣中動以禮自律肅臧獲虔饋祀尤好施舍
不倦嘗勸學士置義田建祠以收族謂學士曰人

須是存天地父母之心而自調貧藥病六畜非賓
祭不殺羽毛螺蚌歲醫百億縱之以爲快慈祥仁
厚蓋其天性然矣太淑人生正德甲戌六月二十
六日距歿萬曆己丑六月二十日享年七十有六
生子男三長位卽學士娶曹氏封淑人次佩光祿
寺署丞娶孫氏繼朱氏次化上林苑監署丞娶余
氏女二長適葉懋以歲貢任歸安教諭次適趙來
亨戊辰進士任高郵知州孫男九大欽邑庠生大
齡大夏大昇大興餘幼未名孫女十嫁字俱舊族
余與學士同讀書中秘時卽稔太淑人賢其後學

士居常口太淑人不置其引歸歸而辭召不至必
曰太淑人老思歸曰太淑人不能與俱來也余見
學士篤慕如此聞其母亡而悲之而又以鄧太史
所爲太淑人狀來請銘曰待子之言以塋吾母於
乎其忍辭銘曰 女于陳婦于張辟纁薦璜宜德
之臧如月幾望相而大官訓而大良豹隱而龍章
以爲爾功鳳山之陽有鬱斯藏爾魄其康爾後其
昌

周孺人彭氏墓志銘

周孺人者江西袁州府經歷同安周某公之配也

同安之翔風里彭爲望族族指最衆環鄉而居因名爲彭家鄉孺人父曰甫仁娶趙氏生孺人幼有至性母趙中年失明諸女皆適人獨孺人以季女日扶持趙賴之年十八歸經府公時經府公有父果齋公母黃氏孺人爲婦孝謹果齋公倜儻好客客至輒延款孺人趣治具進之果齋公延師家塾教經府公兄弟孺人間出金佐弟子脩脯甲午歲饑有司勸諸富人出粟果齋公視其廩未有以應心憂之孺人跽請曰公勿憂婦幸有餘奩可易粟果齋公遂用孺人金先諸富人輸粟有司見爲好

義而不知其得之賢婦之助也果齋公旣歿其例室林遺一女將歸不能具祿翟孺人更出奩中物厚送之黃氏始執孺人手謝曰孝婦孝婦云黃性嚴而孺人委曲承順顧甚得其驩果齋公與黃之喪孺人相經府公致哀盡禮至于窀穸會有寇亂經府公棄事誠信靡造次之悔實孺人從中調度而孺人父母之葬亦賴孺人以舉且贖其所棄田爲祀田爲婦爲女胥稱孝矣經府公任袁州凡四年孺人與偕其在官舍不廢織紝及經府公免歸以所居海瀕寇賊不時築堡自衛亦孺人從臾之

力多焉萬曆壬午某月日孺人歿距生正德乙亥某月日年六十有八生子男四女二孫男九女七曾孫男二女二經府公將以萬曆某年月日葬孺人于曾營山負某揖某而先是斷事君賓經歷君寅來京師致其父命謂必得李先生言以葬予重違其請乃按狀誌而銘之銘曰婦性重施陰固主利亦有賢淑出金市義拮据相夫式穀爾嗣亢彭作周展也女士佳城窈如靈魄斯闕千禩永寧厥後昌熾

楊宜人墓志銘

比部王子揚甫與李子同官于都門時相遇也一日王子爲李子言其先宜人楊氏之賢曰自先宜人之歸不佞也每燕見坐起視不佞不佞起而宜人未嘗敢坐也不佞間從友人游講歸卽夜分宜人不敢就寢必秉燭遲不佞卽又未嘗不肅衿佩如其晝居也其見而起遲而肅自于歸以迨其歿若而年若而夙宵未嘗懈且變也方其歸時奩中裝蓋若干黃金馬先大夫時匱乏則宜人輒出金効之耗其六之五矣其後先大夫有需又輒効金至殫其奩中裝而意滋懌也李子聞王子之言喟

然嘆曰有是哉賢婦乎夫婦順不難而敬難敬而久尤難有而不尸殫而不恡難之難者也今女婦不聞齊邀之容率以倨見有纖芥輒反唇勃谿詬誶不可聞燕安惰慢巾櫛不親夫之夙夜假侍於臧獲往往私蓄藏財視一珥一簪重於兩臂夫君急卒寧署券出息仰他人終不退而謀諸婦又何有於其尊章如此者不獨單門後族也姬姜高國比比而是怒於室而色於市秣以發笑自黠故率恐不吐一旦鼓盆日月有期方且飾其輦輓爲狀謁貴人銘雜引雞鳴贈佩之語且以爲梁妻且以

爲冀婦此之刺謬何啻毛嬙嫫母而已卽毛穎慚顏貞珉恚憤玄壤羞其藏納山靈欲其速毀也盖余不佞每不樂爲銘墓之章多所謝卻迺聞楊宜人行比部君未以銘屬也而不佞自奮而請曰是婦也余願爲之銘無何比部君以父憂去去而後以宜人狀來宜人出建安故相文敏公喬吏部司務肇之女吏部公與比部君父太僕公同舉于庚子相友善奇比部君於其少時而以歸君其孝舅姑敬伯奴教子御臧獲懿美不勝書書其大者而并論之以爲女誠焉銘曰
彼嚚而壽此淑而夭

天不可問夢夢莫曉史氏銘之潛懿乃昭萬禩千秋永安于茲兆


翰林院簡討奎垣楊君墓志銘

奎垣楊君諱元祥字曰泰蒲州人也祖襄毅公博以德業聞望顯於嘉隆之際官光祿大夫柱國少師兼太子太師吏部尚書高祖四川按察司僉事瞻曾祖選並贈如其祖官父俊卿繇武科官錦衣衛管衛事左軍都督府都督同知贈右軍都督從父皆貴士大夫數海內門閥則君家爲甲乙君少小多奇襄毅公每器之于嬉弄間曰是兒吾家汗

血駒也九歲能屬文十五爲諸生十八舉順天壬午鄉試十九登癸未進士三甲第一選庶吉士乙酉授簡討戊子丁都督公憂辛卯復除簡討授小內使書分纂六曹章奏管理誥勅壬辰考三年滿加贈都督公特進光祿大夫封母黃氏一品太夫人三月克殿試掌卷官十二月初六日卒于京邸距生嘉靖乙丑三月十三日年僅二十有八耳君慧悟絕人始入館所論著卽英爽未大勝也亾何蔚然又亾何蒼然所受書不甚伊吾輒成誦凡余輩所爲詩文一寓目久猶能舉其雋余已忘之君

不忘也方君所與同選二十八人齒無少于君者
旅謁廣坐行為殿席為末迺一日授簡而試之褒
然為館首者君也君束髮登朝涉世之日淺顧獨
解事了了如老成人其生長貴家而更折節為儉
其纖嗇即餘牋殘簡不忍棄也與單門窶士無異
惟是性疏暢善謾好諛時以攬秘挨枕施之其所
暱與獨遇余則莊及其揖讓先生長者之前逡逡
然循牆而偃僂又若兩人然蓋君負才自喜居恒
稱唐王勃之為人其襟期曠遠時浮白歌呼廓然
有睥睨六幽之意而君事都督公病晨昏衣不解

帶者十旬其持喪哀毀弔者感動其扶觀西歸跣
行非大困憊不乘乘亦日不過一二十里足重繭
不顧回舍生如陳鳳父葛仲明喪余察君于生死
交情有篤摯者使少假以年厚養深陶未易涯涘
而竟夭也亦足悲已君卒之夜與客驩飲客去猶
預戒厥明所治具就寢而逝聞者驚異之及君歸
櫬余送之郭外因憶仲明喪去君謾言今送葛君
尋則區區重煩車馬矣不逾月果然豈非讖乎君
所著有浴德齋稿八卷襲六齋稿十二卷藏于家
配羅氏封孺人子男二奕芳世芳女二俱幼君弟



某奉母太夫人命將以甲午年某月日祔塋君於
都督公塋次而以狀抵余使爲銘余不忍辭銘曰
英英白玉琢爲圭瓚比陳而毀曾弗及裸才矣楊
君胡嗇而算續鳧則悲尺短何歎臧穀俱亾彭殤
共貫瘞寶藏珍其輝猶璨千秋不滅余銘非謾

憲副小雒公暨配安人贈恭人莊氏墓志銘

萬曆壬辰某月某日小雒何公卒越甲午將塋公
子慶遠太守君使人持李衷一君所爲狀來京師
請銘余自弱冠交太守君公以通家子待之旣延
余授太守君二弟經以師友待之旣余與太守君

同舉畿試以羊家子待之旣而太守君季子爲余
婿以姻屬待之蓋余事公久卽李君知公不余詳
也公初名纘字元述以字行更字元孝號小雒高
祖貴易居鳳嶼曾祖宗移潯美自是爲潯美人祖
燦庠生從郡邑辟授江夏尉生四子其叔曰雄卽
封戶部主事恣所公爲公父娶柯氏封安人爲公
母恣所公蓋嘗爲弟子都講公自幼從父學長始
就傅張少保淨峯先生見而奇之里中疫相驚以
厲公行里中疫者聞厲相誠避何大人而里有叢
祠一老父卧祠下神告之曰爲語何太公所以貴

者長公也年十九爲邑諸生朔望當詣學而公所居距城廿里許家無僮指則以衣巾附其里之鬻蠶而宵行者使寘諸學旁家至廼服而詣學更詣縣揖畢仍附歸計其徒步往返四十餘里而後朝食其勤苦如此學使者試科舉公名第三太公謂孺子年少學未成徒費資斧無益也遂罷不赴省試其樸如此歲戊子京朝官出典試公舉鄉書壬辰成進士疏乞教授惠州甲午分較浙闈時內簾權輕公得一卷與御史爭解首竟第二闈中諸公服其膽力所薦多名士乙未擢國子監博士歷監

丞諸生敬憚之戊戌遷南京戶部主事主倉儲卻羨金千餘三年秩滿封太公如其官太君安人甲辰擢廣東按察司僉事備兵嶺南覈士伍清冒濫汰老弱而簡易持大體不以箠笏鉤距爲能下吏有不及往往蓋覆之延見以禮不爲貴倨容人安便焉一縣令被萋菲總督檄按之公封還檄爲白見冤狀令得釋而有四會令者故人也繫憲獄公救之不能得則哺時就獄中出令共食飲臥起直指嚙公然終不能有加於公丙午總裁粵試得士尤多擢湖廣布政司叅議 肅皇帝幸承天詔修

園陵公以分守賢勞受金幣之賞中貴人使楚諸大吏偃僂爲恭敬猶恐失之公獨與分庭講賓主中貴人不能絀時鎮守廖斌傾御史被逮論戍勢張甚其部曲騎而逆二司不引避公執之廖恚竟無以中也京山有殺三人瘞山巔石匣中久無覺者公忽一夕見夢密訪得尸殺人者遂輸服人以公爲神明云辛亥遷廣東按察司副使巡視海道海道夷舶輻輳故利藪盜賊間發枹鼓時鳴而狡胥猾吏舞文翫法姦如山不可問公故僉憲利孔弊竇及他要害無不周知所摻剔防備甚悉先是署中積牘累千章所株連多者數百少者數十遠者數十歲近者數歲公檢閱可問問之久遠不可問以請中丞御史臺銷之於是宿牘一清直指行部不至瓊以臬司代人憚浮海無應者公曰諸公不欲往常已乎自請行時黎爲亂公行部至白沙猝遇寇持刃擬公不動已知爲公遂解散語稱忠信可行不虛耳獨以法繩吏部御史家詰責其豪子弟及癸丑大計二憾擠公公以劾去事二尊人孝甚同母弟二異母弟三從弟一仰公之貽無不贍給如子故里中稱孝友必曰何公而坦直無城

府不知人間有機械知亦不較其自奉脫粟飯沙
觸齒咽之更不誰何爨者親戚過公卽貧下倒屣
延接惟恐不及嘗自言平生居官獨有一日以室
人產難故不出卽家居篤老遇慶賀必宵興至邑
社零禱徒行赤日中伏臘之會自旦至昏拜揖酬
酢後生告勞而公矯然無倦色蓋天性好禮亦精
力有過人者郡邑大夫致之賓筵至于再三豈不
以其人長者足重哉配莊氏柔婉寡言初歸時柯
安人育而病恭人代之乳太公間以副室恚安人
不懌公與恭人踞榻前意解而後起安人老廢視

恭人佐公視膳問寢朝夕不離以爲常乃其爲公
置副斂已端居不問衾裯舉家棟委之愛其女如
已出尤閨閣中所難者封安人其贈恭人以太守
君守趙秩滿也公生弘治甲子某月日距卒年八
十有九恭人生弘治某年月日卒萬曆己卯某月
日年七十有二子男三長卽太守君居魯次居廣
國子生次居憲郡庠生墓在縣某都某山以萬曆
某年月日塋某旣次其事系之銘銘曰 夷乎其
宜也款款乎其幅也納納乎其無閭闔也毋畏彼
豪惟法是勅毋謂我耄惟禮是力惟孝惟友爲鄉

李文節集卷三
人式其弘治淳龐之氣所培植邪婉彼恭人實惟爾特雙魄同藏永安于茲域


憲副卓庵錢公墓志銘

余已丑分校南宮所得士工部錢君養廉卓庵錢公子也及辛卯典浙試而其仲養庶復在選中旣撤棘見公恂而幅無縛節無貌言殆有道者別三羊公歿工部君行河泗上奔武林屬會稽陶太史君狀公而徵銘于不佞曰願得一言以不朽吾先君子余按狀公諱立字守禮其先汴人宋靖康扈蹕南渡居杭之海寧六傳至得中得中生震始自

海寧徙仁和震生毓毓生文文生銳封兵部武定司主事贈太平府知府娶余氏累贈恭人爲公父母以嘉靖辛卯四月六日生公公生卽穎敏八歲就外傳讀書一再過輒成誦十三歲失母恭人太平公食貧而所居省會人往往逐什一或諷公徒業公奮作色曰寧儒而詘不願他而羸長老壯其志爲決策受書二十歲補邑諸生戊子舉于鄉乙丑成進士授刑部雲南主事時海忠介公以言事下獄居處橐餽公視遇惟謹忠介公得長繫無恙有舞文胥當戍未決一日以新鄭相公書來公意

新鄭素剛是書且有詐往質之果然新鄭怒欲置
昏死公曰法無是殺之與翫法等竟坐戍去為刑
部一年調兵部武庫司視武學丁卯遇 穆廟登
極恩得封贈其父母其秋請假將父還武林明年
赴京除工部屯田司所督殿主薪蒸公條上便宜
七事汰冗剔蠹以廉幹聞已巳丁父憂壬申復除
工部會有 山陵之役使公監將作役竣校費省
他曹什之三四同舍郎更反唇謂矯詭爾何術而
所省若是既錄勞 賚銀幣加秩一等而其後同
舍郎以工圯貶絀有差獨公所治完好不及於罰

始知公實躬親拮据用勤為省非噉襮其迹以徼
名一時者癸酉進營繕司員外甲戌進郎申尋擢
知太平府時蕪湖無城盜剽闕稅操江都御史備
兵使者並被斥責守令期日獲盜令急不知所為
執賈人誣伏償亡欲以塞責公聞之曰是非盜有
司真盜矣解縱之懸購授捕者方畧不浹旬盜盡
獲金無所失所縱若干人始議城蕪公謂蕪不虞
盜盜所利賈人爾牒當道請以賈七民三受役令
既布而城成壯乃逾他旁邑而郡西湖田千頃岸
善崩水輒入公劾石堤四十餘里遂為負郭郡人



利之又郡有馬戶國初時所籍使牧馬者後廼賦其芻賦重不能支率亾去有司猶追呼不已公謂此與伍籍異賦可闔邑均也取其額槩攤之而馬戶數百來歸矣公在郡四年勸農蠲逋平獄詰姦興學作人聲籍甚部使者交推轂太平凡二十餘章丁丑滿秩得復加贈其父母戊寅擢廣西按察司副使治兵永寧永寧徭徼地公謂不當繩以一切惟是蕩佚簡易寬其小過宜易爲治適土夷爭田治兵相攻諸武吏競請勦公不聽檄諭以禍福皆羅拜惟公生死之公法其一二首難者餘寘不

問所全活無數公故恬於仕進自郎署與郡意未嘗不在林壑居樟鄉旣不能具水土而會八寨議起公與督撫意左遂日投劾遽歸是爲己卯旣歸屏跡公府獨時與二三朋舊觴咏湖山間晚歲兀處一室焚香手一編不戾念是非利害類所居軒曰怡老樓口愛日所著有起曹稿歸田稿怡老軒日纂若干卷云工部君稱公生平有三不識與人坦直如不識世間有機穽事衣食淡菲室無姬媵篋無珠玩如不識世間有嗜好事緘默不道人過有及人帷簿者則閉目不應如不識世間有猥雜

事蓋其天性也乃其內行淳備事叔如父事嫂與
其姊如母撫季及季之子如子媿黨交游或以急
抵未嘗不竭應之故武林人以公爲長者壬午
之歲羣不逞以踐更發難城內巨家皆被剽獨相
戒毋敢入錢公家於乎此可以見公矣公卒萬曆
癸巳二月二十日距生年六十有三配嚴氏累封
恭人子男四長卽工部君將以某年月日葬公仁
壽山錢氏先塋之西偏公所自筮謂工部君吾魂
魄祖父焉依足矣毋爲形家所惑銘曰 武林名
區風或或錢公忘機獨守村烟烟其中外粥粥守
官如弦羞蓄縮憲轍方驅遽說輟引雛翩翩起鸞
鷲仁壽之丘公穆卜千秋萬歲藏真璞孤兔遠遁
颺颺伏予銘斯石徵公德

憲副小春穆先生墓志銘

予居恒講當世士大夫則知魏有穆先生云而予
同年廷尉丞劉公魏人方予守史官而劉公爲御
史嘗從容言穆先生所爲神交於不佞者旣而穆
先生命其子太學君以博士之業介劉公而見予
太學君能讀父書文奇甚予嘉其才而嘆穆先生
有子也旣而先生歿且塋而太學君復因劉公以

李文節集卷三
狀來請云父病時囑曰吾死子其謁太史銘吾墓
嗟乎先生以文詞雄當世不佞亾能爲役何以銘
先生顧先生行誼卓犖不佞慕先生久矧遺言在
焉又何忍不銘先生諱文熙字敬甫號少春世居
大名之東明高祖敬曾祖山祖錦並孝弟力田不
仕父陳封禮部精膳司員外郎歸落有高行語在
大司寇弇州王先生贈序及大司馬曲周王先生
所爲志中母陶氏封安人以嘉靖七年正月十一
日生先生先生卽穎異不凡八歲能屬文下筆
作驚人語十六歲爲諸生名籍籍試輒取前茅先

生高自負恃東明生鮮所當其心獨折節今大司
馬石先生曰此其爲東明一鶚諸生驚焉耳是時
石先生方垂髫先生長於石先生而身下之與同
塾共臥起相友昵卽兄弟不啻也嘉靖戊午己未
石先生先登官行人矣而先生猶時以其業訂正
石先生如其同舍時越辛酉壬戌先生繼石先生
連舉進士甲子拜官亦行人東明人咸嗟異先生
知人能取友卒藉其切劘以有成云先生爲行人
東使魯西使代雲中南使楚所至磨崖勒巘志游
紀勝之章競爲人傳誦隆慶丁卯遷行人司司副

戊辰遷工部都水司員外郎先生覩時迂事燕居
深念瞿然有漆室倚楹之感獨以職非其任不能
有所發舒於是石先生爲給事上疏言時政斥及
近習無所諱避忤 旨杖北闕下中貴人欲乘而
甘心從吏無敢前先生挺身闖入遇朱程二緹騎
抗手語之曰給事今日之命在二公二公萬代之
名在給事二緹騎領之陰戒主杖者得不殊及杖
畢而中貴人閔然詈給事壘榜交下血肉淋漓先
生以身翼蔽扶曳而出僦舍都門外爲延醫裹藥
跬步不離側旣乃盡出橐中裝及所鬻邸直若干

金爲給事歸計而自圖請急與俱歸或以時當
冊立東宮胡不少需爲太公地而先生已決策太
公從東明來更從臾之遂買兩舟一載二先生太
公一載兩家妻子一時郊垆津次觀者如堵牆而
海內傳聞莫不以爲左儒羊角復出也先生旣以
高義重縉紳間居亾何爲歲已巳起禮部精膳司
員外郎封太公如其官庚午改尚寶司司丞辛未
改吏部稽勳司員外郎尋調考功數獎進人才不
匿聲跡人固目攝而會有所善御史疏劾貴要人
未上貴要人聞而斬先生居間不能得而意先生

陰嘆之因以釋憾於先生於是先生繇考功出廣東按察司副使萬曆改元京察遂削籍壬午遇恩詔致仕先生故恬於仕進粵臬之遷自以不能堪水土念太公不可往卽移病曰吾其從此爲逍遙遊矣歸築逍遙園居之左圖右史朝披夕諷所交游盡海內知名士郵筒遞致束脩之間歲時不絕而太公故善治生先生持之以節約數十年隴畝之入困窮之侍日長月益自有餘饒因推以贍其親朋族黨蓋嘗割地一頃爲學田及修文廟振諸生窶者諸所爲德於鄉甚夥其尤鉅者丁亥旱暵

三輔間道殍相望先生輸千金佐縣官食餓所活人無算上聞詔有司爲坊旌之先生辭未允而明歲饑益甚先生曰爲德不終義於何有乃盡括其餘貲復輸千金所活人復無筭先生謂卜式輸粟助邊爵之媒也陶朱三散千金以財爲戲也吾不要爵亦不敢等財爲戲仰視二公欲爲鼎足不知千載之上二公其許我乎是時都御史御史疏聞上益多之有司奉詔建坊固辭竟不得辛卯秋霖雨浹旬沈竈產蠶邑不火食先生家有積薪恣民所取賴以舉火者萬戶蓋先生平生輕財

如礫遺榮如蛻惟是慕義樂施急難恤困好行其
德爲孳孳而酷嗜書史自墳典而下諸子百家言
亾所不窺積卷帙至十餘萬朱墨點竄盡爲重覆
所刪書數十種所著有逍遙園集其稱詩宗高岑
王孟尤工近體每賦咏論著推敲礮琢抽肝擢腎
至忘日之出入其築園闢墅結樓飾榭種蒔花卉
裒致竹石特以供題品爲文事之助及其病革乃
盡舉所積圖卷火之曰大造陶物自無而出爲有
復返有而入於無今且解天毀而游太空何以此
爲嗟乎先生真達也已矣而先生著作在人間其

德在其鄉之人其左半在其子燬而不燬者在亾
而不亾者存也先生孝而太公太君齊壽極生事
之驩戊子太公歿太君繼歿喪塋如禮亾何先生
樓居而病樓故顏奇雲病後乃改爲白雲人曰乘
彼白雲至于帝鄉先生其長往邪歿之日爲萬曆
辛卯十二月初三距生年六十有四以壬辰十二
月某日葬銘曰 春秋穆叔漢穆生如晉辭楚兩
頡頏千秋繼起東明公鐵石爲肝錦繡腸善人在
患饑不饒棄官殉友何慨慷起家游陟銓曹郎清
通簡要兼裴王仕路繇來似太行懸車卜築學豹

李文節集卷三
藏身隱猶自現文章逍遙園裏富縹緗長歌短句
滿奚囊藏不必多戒厚亾踈跂躑躅獨皇皇括貨
市義食翳桑千金再擲起什僵天子高君爲樹
坊室如懸磬名如薌豐丘高阜坎其中文星下映
馬鬣封土廻木夔呵不祥芝生蘭茁桂叢叢萬年
埋壁猶騰光

李文節集卷之二十一

晉江 九我李廷機著

志銘

贈君雙峯汪翁洎配安人潘氏墓志銘

贈承德郎南京戶部河南司主事雙峯汪翁者予
同年進士今泉州守汪公之父安人潘氏其母也
當泉州公以留計課績馳贈厥父母而予承乏演
綸因得聞汪翁所爲爲德於鄉者予自是逢人輒
喜談而予迂不樂爲人諛墓惟是畸人修士嫩行
姱節卽不予請而予顧有意焉及泉州公旣蒞吾

郡當是時翁安人塋各若干年往矣而墓石尚虛
泉州公廼以狀從郡中因同年李伯東寓書徵予
銘按狀翁諱析字束夫先世徽州婺源人其遷安
慶懷寧雲田坂自小二公始數傳子孫蕃殖稱閭
右翁父曰子昆母某氏生四子翁於倫爲季而翁
孩幼多奇童卅有志操父母最憐愛之比長讀書
攻文注意鑽礪數歲未有所知名會年饑翁見里
人掘草剝樹爲食而力無以賑又感諸汪以諸生
應舉者一時皆報罷奮然曰夫所爲明經斬一命
者圖濟人爾有如布衣巖處而可賑窮匱起枯瘠
何必明經於是棄經生言不治治家人生產作業
而潘安人更脫簪珥躬績絀畜雞豚服蔬茹淡拮
据佐翁居數歲家廼大起懷寧地薄鮮蓋藏粟易
貴賤每春夏翔涌及秋無問登耗約減直十之六
七翁念惟積粟可活人而視其家藏粟已數千石
廼於數十里內度地爲義倉五碁置相望各儲粟
若干每粟貴時出予人而及其賤收之糴無騰價
貸不責息逋不能償者燔其券數十里內仰翁粟
而活者三十年卽歲饑而不害而翁躬親其出內
自龠合粒顆手程目閱晝籌夜筭劬躬疲體累碁

歷禩而倉不加益室無羨貲皖城富人或竊笑之以爲是脂膏不能自潤徒益辛勞爾翁仁心爲質出乎自然人鬻產雖磽确輒售以厚直旣蓄畬确者稔矣請贖如故直卽又輒歸之鄰有雙婆其家傭盜也偵翁買粟金多謀羣盜夕掠去有司捕得傭婆怖甚請輦其家以自說翁誓卻而爲白之官曰婆實不知其長者如此初翁事父母孝父母所欲與卽殫竭不顧計要以驩其心及歿致哀歲時伏臘卽語及淚未嘗不簌簌下也女弟遠適而婆母念之不置翁特爲授室近母而分田長其孤其在伯仲之間急難禦侮劍履倉皇事夷迺已二三從子間請以產歸不許請粟或緡許之曰先人所遺毋棄也語稱孝弟仁本有味其言之矣天道與善翁所爲德而不取責者竟收之泉州公卽泉州公未貴時而懷寧人交口誦義有構得一言立解庶幾返訟風其歿而沐浴焚香辭家廟屬兒媳馮几書遺言危坐而瞑無怛化意非視履其旋不及此予覩世齷齪纖嗇積粟腐倉不忍句人一斗利歲之凶昂其直猶閉不卽發曰徐之且益貴或以貫貸漁食寔民重息而急責何論素封卽縉紳往

往而是比南北薦災歲所蠲賑損 國賦帑鏹無
算藉令邑有汪翁縣官不憂民民不憂歲無爲煩
有司矣泉州公爲余言翁善心計有方畧能趨時
取予自翁亡後倉政寢不如其在日予謂盛事宜
紹述卽長公不皇次君盍修業而息之泉州公迺
言往歲次公捐五百金爲賑旣而聞之邑若欲得
一旌者長公笑謂曰而翁爲德三十年人不聞仲
所捐幾何而靳聞乎此仲不及而翁明矣嗟嗟德
門哉德門哉翁生嘉靖癸未八月某日卒萬曆癸
未七月某日享年六十有一安人生嘉靖己丑八

月某日卒隆慶己巳四月某日享年四十有二繼
安人者施氏子男四長卽泉州公銘曰 仕無所
施仕亦徒爾隱而能施吾謂之仕懷玉則貴衣褐
何鄙仁哉汪翁濟人心侈決策鹿門樹德畏壘居
有積倉鄉無歿徙潘媪同心黽勉無有以散爲積
左券在子蒼蒼佳城雙魄綏止我銘斯石徵于來
禩

隱君石泉林公洎配潘氏墓志銘

永春四五都之錦斗鄉林爲右姓公諱鐸字鳴盛
號石泉初娶於謝無何歿乃娶潘潘亦卓坡右姓

李文簡集 卷二十一
也公少年爲學官弟子自以所居僻陋游學南安
及莆田以自廣學旣通受廩有年矣則又以男子
志在四方一日投劾博士去而將卒業太學裝且
具會喪其仲弟無何復嬰風疾疾平而意闌竟不
往而業已解諸生籍從此稱隱君云時承平久公
先世故殷稍因其遺業而息之家浸起諸林亦並
殷阜多蓋藏而繇此漸奢濫諸昆弟子日夜鼓鐘
酣嬉公心憂之不能禁也迨嘉靖辛酉壬戌島夷
之亂一二愚騃潛聚不逞而不令之從子爲所誘
惑公虞難及已迺携孥之郡中時永春未城邑令

郡處而林氏直庫役諸林皆亾匿一切供億悉責
辦于公而令性婪以公從子故輒有所要索迨役
竣而公貲盡矣亾何復喪其長子庠生文洵二子
皆幼癸亥寇平返故里給執其從子歸之官家迺
寧而是時畝無粒入邑有逋賦里胥隸卒絡繹至
門公但出濁醪與飲而公先醉就榻齁齁熟睡不
問里胥隸卒去否也公不能握筭一遇賦役常用
駟贖居間急卽鬻田贏縮輸納悉以付之但涉筆
出券而已性嗜古書畫琴研諸玩器至破產購之
有非笑者公不爲動獨痛其受書不成長子才而

李文節集卷三十一
五
竟夭於是其季女不以許人曰吾將求能貴吾女者而託焉一日公與某會友人黃君所公出語黃君曰使予得若人爲壻足矣蓋某已先委禽王氏不數日王氏歿黃君爲蹇脩而余爲林壻卽余謝鮑宣而公鑒同桓父亦一奇也公旣老白首日相牟澤畔田間歲時伏臘召里中老少共酌醉卽解衣礮礮更不修飾拘檢有標枝野鹿之風而公實賴潘媪善拮据日雞鳴卽起櫛沐視炊爨食諸傭作使藝田而後乃朝食晝績麻夜焚膏繼之夜深猶持炬扃鑰蓋藏而後寢自于歸至老終其身以

爲常錢穀出納兒女婚嫁親族慶弔賓客往來臧獲調度一切不以煩公而性和婉沈默口絕詬詈公老猶嬰兒余嘗見其有漫問不對而已處妯娌不校族屬感其恩厚卽有違言者後亦旣睦公所不問家生產修混沌之術以全其真內助有力焉公生弘治乙丑正月二十二日卒萬曆丁亥某月二十九日年八十有三潘生正德辛未九月十一日卒萬曆壬辰年二月初六日年八十有二子男三長卽文洵次文治文瀾以某年月日塋於某山

李文節集卷三十一
某謹次其事志之而系以銘曰 古稱葛天無懷
之民公與爲隣爾偕爾佐亦有室人生也如賓歿
則同窀既固且安以利其後昆

明故誥封恭人鄧氏墓志銘

鄧恭人者憲副后林胡公元配太守葵南君母也
恭人父曰鄧大輝母吳氏鄧故平和右族然無顯
者形家相其宅云當以女顯及恭人生端靜不凡
有語動率合女誠父母奇之爲相攸得憲副公字
焉年十七歸憲副公適父贈太僕公捐館恭人新
婦執喪如禮奉姑沈安人敬共婉姬能得其驩心

而手紡績以佐憲副公讀憲副公嘗負笈澄海會
歲饑而沈安人在堂太守君在祿恭人拮据家楮
憲副公無離憂其自澄海歸學益力恭人力作副
之嘉靖戊申憲副公始爲諸生明年己酉舉于鄉
越丙辰成進士授行人皇華之使將母不違則緊
恭人是賴已遷戶部主事歷員外郎中屬以無妄
待辯里居而沈安人率弔客盈門恭人調度劑量
無不精辦者凡憲副公先後所爲父母窀穸凡百
周慎內助之力爲多比服闋左授運司判官尋陟
南太僕丞恭人從之滌會 天子覃恩而恭人始

受安人封已歷南戶曹擢守高州恭人從之郡猶
日績不休憲副公謂恭人古有拔葵去織者今二
千石祿不薄而安人猶績何自苦爲恭人應曰君
爲公儀休吾爲文伯之母何不可者蓋恭人性勤
其持家常以身先臧獲無鉅細必親內外斤斤罔
窳惰者其教太守君聞雞篝燈拂案趣起讀聲琅
琅迺喜君間起遲密從他所巾櫛而後敢見也家
不藏樗蒲陸博之具有輒碎之其嚴如此太守君
以學術治行顯於縉紳間其令江陰用循良考最
進封安人爲恭人制詞稱以子恩俾從夫爵蓋異

數云恭人旣益貴顧意常澹如食淡服素卽太守
君不時有所獻遺卻弗御獨于族黨雅好施爲其
父母菑贍田築塋治榷諸鄧豔之始信曩形家言
不虛矣而所尤難者太守公兄弟四人其叔氏庶
也安人撫若已出所製衣必與季同色如一縑不
兼製輒令易服鳴鳩均壹恭人有焉若其以女妁
水部吳君謂其才且善人之後而水部果弱冠登
第奉 詔歸婚一時閭里以爲榮觀蓋女流而負
人倫鑒者乎恭人儉勤溫惠爲婦爲母備德無斁
可謂能恭而夫子駢貴寵渥重膺名號冠帔光華

李文節集卷三十一
烜赫修齡繁祉孫子誥繩天所以享恭人者亦成
矣恭人生嘉靖丙戌六月某日卒萬曆壬辰二月
某日子男四長卽太守君丁丑進士與某爲庚午
同年娶沈氏贈孺人繼娶廖氏封孺人恭人墓在
大陂之原負某揖某塋以萬曆癸巳年正月初五
日而馳狀來京師徵余銘余年家子也與太守君
相友善其忍辭銘曰婦徵夫母徵子疇得全恭人
是妻如賓女而士姑章怡家政庀老猶勤貴罔侈
予之成愛勞以育他出同毛裏儀孔臧受多祉婺
旣沈魄藏此鏤貞珉告千禩

明故封大孺人羅母江氏墓志銘


江太孺人者工部主事羅君母也太孺人父曰湖
滿母林氏以正德丙子十一月初四日生太孺人
于連城百安里爲次女自幼端重寡言善女紅里
中諸女莫能及江翁旣蚤世林媪孀居篤愛之年
十五歸贈文林郎武陵縣知縣羅旂峯公是爲工
部君父羅故居長汀之青巖以孝弟力田世其家
太孺人爲婦井臼管釜無不躬親事尊章屏氣齊
邀手烹膾洗腆而敬進之其處妯娌間無違言雍
雍如也贈君游邑庠始自青巖徙長汀太孺人拮

据佐贈君學者若而年贈君累舉不得志而工部君兄弟長就傅太孺人則日討工部君兄弟而訓之以弓裘之當繼薦藜之必豐有約君遠學者亟之曰孺子近則勤惰易稽遠則燕僻莫詰故君兄弟不離父母之側而常若嚴師之臨卽古所稱九熊畫荻奚翅焉嘉靖壬戌贈君下世工部君歲教授于外賴太孺人持家政得一意以教爲學竟起家明經萬曆己卯舉應天越丙戌乃爲令武陵太孺人就養邸中淡約猶如家食見工部君洗手奉公筐篋蕭然滋益喜武陵人感令君惠政人人交口頌令君已而知令君有母有語者曰大孺人之教也則人人又無不交口頌大孺人者大孺人以工部君奏武陵三年績得受封逾年君徵入爲工部甫數月而太孺人卒卒之日爲壬辰正月三十日距生年七十有七太孺人慈祥明達識大義江故單寒其後僅一人年逾壯失耦未有子太孺人一日當食而歎曰吾家祚緒不絕如綫有如此子不可知江氏之鬼不其餒而語畢泫然泣下工部君承其志亟假貸爲續室舉二子而江氏子遂卒江迺得不絕家雖食貧而好施予時時絕甘分少

李文節集卷三十一 志第二

以卹鄰人之饑寒族黨或逋賦逮繫來告急輒罄
竭旬貸之至奩無留簪不以介念也初工部君塋
貽君為廬其墓側而以白太孺人太孺人曰此亦
孺子一念第往吾朝夕有而弟在已而虎噬犬又
噬僕太孺人第令於廬外編籬戒君毋輕出蓋灼
然知君誠能遠害而欲遂其孝以成其名如此不
然豈其重遠學而輕近虎哉太孺人善績晚年以
績課諸孫曰汝學猶吾績也吾少時績見其漸績
漸多心中自不肯放下汝曹朝講暮誦日復一日
覺得趣味亦終不忍釋手太孺人女流迺其善喻

似儒者謂之女士非邪鵬不字鸞棘不結桂工部
君學行重鄉評出以政事顯子孫斌斌秀而有文
太孺人之母儀為多太孺人生子男二長即工部
君尚賓娶劉氏封孺人次邑庠生尚賢娶張氏女
二長適楊權次適邑庠生藍潤孫男四孫女四曾
孫男五曾孫女三工部君以癸巳某月日時奉太
孺人喪窆於城東十里許大舖上頭坪山之原負
子向午而以狀走都下徵余銘余習工部君聞太
孺人賢為乎辭銘曰 母亦嚴君慈非煦煦不有
聖善斯義孰觀學遠慮嬉孝豈憂虎玉子于成名



垂弗腐鬱鬱丘原其封若斧余爲之銘以告終古
明故誥封恭人蕭氏墓志銘

予巳丑南宮所薦士京師趙元卿司理廣陵名籍
甚會且徵矣不果遷計部入仕何母恭人捐館舍
元卿以不得徵故得侍疾視含斂馮太史狀謂不
以彼易此洵哉言矣予往弔而元卿持太史狀請
銘按狀恭人蕭氏明威將軍指揮僉事潔軒趙公
配也恭人以司理課最封而從夫爵乃得稱恭人
恭人始歸明威公年十三耳兩尊人咸在恭人爲
冢婦佐明威公孝養兩尊人甘臚寒溫事事當兩

尊人意巳兩尊人亡明威公喪葬兩尊人而撫其
弟若妹恭人持家棟一切饋奠寔定與弟妹食服
婚嫁脫簪解佩拮据毳勉又事事當明威公意明
威公敦詩悅禮講韜鈴起家武進士致身環衛恭
人之助爲多恭人於蕭氏昆季無私惠迺諸趙歲
時問遺不絕或孤嫠以乏告不憚罄竭應之曰趙
宗也恭人既有子元卿矣年方茂更爲明威公廣
嗣計置副室二舉二子育誨之如元卿焉元卿成
進士理廣陵恭人就養亦以觀元卿居五月見元
卿舍中無長物也魚蟹之外無他供也一日謂元

卿曰孺子如是吾何憂吾歸矣省刑一言孺子勉之故元卿以廉明仁恕大得廣陵人心一時海內稱名司理無不推轂廣陵者恭人還自廣陵不見元卿五年所比疾而元卿歸天所以始終報恭人而成元卿之孝意其在此沒之日爲萬曆乙未四月初八日距生嘉靖己亥四月十五日享年五十五有七子男三長卽元卿拱極恭人出己丑進士今戶部雲南司主事娶王氏贈孺人繼娶鮑氏封孺人次瞻極副室李出娶董氏繼娶李氏次環極副室王出女一李出適順天府庠生章堯臣孫男三元卿出長燿娶唐氏次煌次燦元卿卜以是年五月十二日塋恭人于長慶壩祖塋之次負癸揖丁實奉明威公命予旣志之而系以銘銘曰 相德微曷從睹夫若子徵賢媿繫恭人德膺膺夫干城子簪組齡猶耄歿不腐長慶原祔趙祖壤朝陽窆夏五萬斯年綏爾祐

按察使鄉賢特祀紫溪蘇先生墓志銘

紫溪先生自少與余某交卽以道義相劇切稱莫逆迨癸未余舉進士復出先生之門蓋相遇甚奇而交甚久知甚深今先生之塋也其壻孝廉莊君

爲狀而以銘請嗟乎余忍銘先生余又忍不銘先生先生諱濬字君禹別號紫溪本宋蘇公緘裔繇光州徙閩家晉江之清溝王父顯父玉金以先生貴贈廣西布政司左叅政王母某母陳並贈淑人先生總角與余輩結社開元寺推翹楚矣旣而授經同安今副憲王瞻明家家多藏書廼盡取而讀之自是所爲文蒼淵宏肆一時經生藝士遂無能當先生者歲癸酉今中丞泰和郭公分校閩闈夢蔡文莊公出其門及得先生卷奇之薦爲榜首越丁丑今少師長洲申公得先生卷以觀張文毅公

語之曰此卷必晉江人非蘇則李旣折卷爲先生人服其知言而公猶以僅冠其房爲惜云先生以名進士授南刑部主事亾何丁外艱服除補工部董慈寧宮工綜核節省於中貴人無所徇楚相有疾九列行禱部尚書以禱詞命先生先生不屬也癸未之役所舉多魁人名士卽以余之不肖幸爲先生所收不則爨下桐耳甲申調禮部乙酉兩浙缺督學今少傅四明沈公爲少宰以爲地大時逼求才望有精力無如先生者以其名上得旨遂行不數月遍歷諸郡所試卷字比句校評品精詳人

稱先生至公至明至敏督學無前矣惟是先生嚴謝請謁卽遺才試一切不少通以是戾俗而先是督學有本無特鑒而乍優乍劣顛倒以爲公者又往往一試而止先生鑒精巡歷勤試至再三本未嘗有所識別而優劣不遠於初試庸士困不得志則以爲沿舊案有成心也故先生精勤獨甚而謠詠獨多然興古學重論策一時士斌斌嚮風頗修先秦兩漢之業自是累科賓興什九皆先生所識拔而論迺定他如禁溺女禁火葬又皆有裨風化者已丑遷陝西叅議領商維道捐俸葺庠與秦士談經講藝白兩臺行條鞭法爲諸道先時乘一款段巡村落問民疾苦父老或延至其家出酒蔬餉之先生與相勞苦如家人父子久之乃去有鑛盜數百列柵旅拒州郡不能禁先生檄諭之亦遂解散壬辰遷廣西按察司副使備兵蒼梧癸巳遷叅政領桂平道會岑溪徭變先生用廢將陳遴以吳廣爲先鋒親督戰首功餘二千而徭平粵西羣鄉先生久處無幾微介意時同門蔡子瑞銓曹先生移余書寄聲子瑞但云某賢何不遷某賢何不起而已丁酉入賀事竣遂疏病乞致仕余問故先生

言修志嘔血卽愈不能勞勞且復發余亦不勸駕而先生歸不得請仍擢觀察貴州竟不赴蓋歸一羊餘而病以萬曆己亥九月初三日卒距生嘉靖辛丑十二月廿九日年五十九耳當諸生時葬母及王父母婚娶伯氏遺孤不計有無族有與太公構者常調停其間及登第待之甚睦生平以義利爲大防官居無所取受篋無贏貲居無豐屋歸來爲廬數楹於先人之墓側讀書談道足不入公門至陰爲鄉民何法嘉白寃力阻欲墊白鷺埕爲田者卽不惜齒牙不居德也胸襟灑落好登臨山水

引觴輒醉醉輒歌歌曰由三爲形吹萬爲聲逍遙易息不貸易營衆人皆醉我何獨醒其乞休而當道強出之辭曰用世如虛舟存而不繫過而不留不以天下爲已有出世如遊魚遊乎江湖忘乎江湖不以已爲天下有何其達也病亟知不起遍召所親與訣別語其友鄭道行曰吾位吾齡至是足矣詔其子廷樞曰斂用故衣棺不過數金吾親斂薄毋使吾不安於地下若祖祀田吾笥中遺金五十可稍拓之惟是吾嘗撫國朝實錄及諸郡邑志所載名臣佚賢遺蹟欲倣太史公爲紀表傳以行

而今已矣言訖而終今先生所著書行於世者有四書易經兒說生生篇雞鳴偶記三餘集漫吟集先生沒而鄉人士合請於當道特祠先生與蔡文莊陳紫峰二先生祠並噫可謂不朽矣先生娶柯氏封淑人子一廷櫛舉乙酉鄉試娶庠生鄭君相可女後先生一年歿女二墓在南安三十三都石菰山背乾面巽虛其右以待淑人而其前爲二墳左廷櫛君右鄭以萬曆壬寅十一月初九塋焉蓋穆卜規畫已定而莊君言廷櫛嘗夢先生告之云石菰亭孔子墳今山名墳制適與夢叶非偶然也

銘曰學辨義利士矜名節出則直方處須高潔學憲士模惟公惟執統綉連茹孤寒於邑悠悠末世奚顧奚惜諧俗爲通膺仕爲適漏盡猶行筐盈猶摘陽橋可爲玄草何益偉矣蘇公超然遠矚亮節清風特祀不作紫嶽鍾靈菰山瘞魄玉韞珠藏其輝猶灼貞石蕪詞李生所作

易庵龔公墓志銘

余在公車時嘗僑居晉陵晉陵士友交知若桑與梓矣有易庵龔公余未及與之游然竊稔聞其學行迨余出典南畿試而龔君仲友鬱爲選首余見

其爲晉陵人則喜已而知其爲宿儒名士之子則又喜亾何忽聞公病越四載而公物矣歲已亥余貳南銓仲友君將塋公迺持狀來南都請余誌銘之按狀龔氏自宋六三公居臨江仕高宗朝爲宣慰使扈蹕南渡鎮撫新塘遂占籍新塘六三公之次子官千戶凡三傳有衡可者 國初知費縣以王事卒於官是爲公七世祖衡可生采采生址址生淵淵生訥弘治中貢爲新城學官訥生祖禩受廩郡庠蚤卒配趙氏蚤年砥節竟訓其孤以儒聞曰畏庵公安節者公父也畏庵公孤貧力學爲諸

生祭酒公年十九而畏庵公見背年二十五補博士弟子員公骯髒自負俯視一世每社課援筆立揮日未昃七義在几徐徐囊筆石去曹輩咸遜其捷而數奇甚數試不收卽廩次當補會他故亦竟不獲補顧益雕心擢腎肆力於古文辭兼總百氏別其精深以至稅官稗史青烏玉版醫藥卜筮之書無所不窺其爲文宗看山一氣呵成不尚刻削每言文者氣之所爲邇來詰屈詭異以欺世者何異吳門敗纁僅尺面耳何能得十尋之錦焜耀宮廷千丈之纊衣被閭左者哉郡邑大夫鄉縉紳慶

祝贈別將有所論著必籍公筆爲重戶外之屨常滿而公復敦尚操行取予嚴峻常有故人當路某子甲被逮急祈公居間橐百金爲壽公却之山西徐公節者常受經畏庵公所來守吳郡復徙觀察先後在吳十餘年諸舊遊過徐公徐公輒問畏庵先生子安在而公弗往也事母錢氏盡歡卒時年八十居喪毀瘠痛父蚤世篤於諸父昆弟推食解衣不能娶者爲之娶卽人以急來竭蹶赴之指困折券時有耳與配趙孺人相莊白首趙孺人舉子晚母錢急置貳孺人亦以爲宜公獨不可母孺人伺公出納一姬公歸驚訝亟走告畏庵公墓遣之孺人廼連舉四子長卽仲友也公撫之曰吾將弛擔孺子其克負荷乎日摩切以經史及旣舉於鄉取古名臣言行暨國朝典故詩文爲仲友昕夕講說不休三年而仲友學殖益富遂以戊戌舉矣當公少而孤嘗有豪欲效其居兢兢不舍挾而誘之者萬狀屹不動一日嗾奴數十輩從垣一方亂石如雨屋且碎公讀書若弗聞至是謂長君曰彼豪今安在哉吾昔不挫於彼今亦不忍乘其敗也因論果報以爲戒公素豪酒有痰疾聞仲友捷書

因論果報以爲戒公素豪酒有痰疾聞仲友捷書

一飲痰湧遂痿痺丁酉冬趣仲友赴南京曰孺子無以吾爲慮吾貞疾孺子一日登第則霍然已矣越明年而終公生平獨行一切世味無所嗜獨嗜書晚年遊于酒飲可三五升而醉醉後誦出師表或李杜詩琅琅如也居恒溫然樂易一臧獲不忍傷而遇顯貴人則多隱避去偶值於坐必藐之談論侃侃內行淳備室語可市也蓋龔之宗有澗松心韋兩公仕內外臺多聲績其後有今憲副修吾公而公能績學飭行孚翼厥子以顯于時毘陵人閱閱龔氏必首推公之隱德云生嘉靖丁酉四月十六日卒萬曆戊戌正月二十二日享年六十二配趙氏故趙公沆女子四長卽仲友君三益娶趙察女次三鳳娶楊仕倌女次三浚娶陸僧女次三覲娶徐文明女女三長適莊廷臣次適白貞泰次適池鳳毛孫女二長字董孟醇三益出公墓在倉灣祖阡負某揖某以巳亥九月廿九日塋銘曰文能摹古而不詭氣能忍辱而不滓抱奇負異而行蓬累其豪而不能平者逃之酒其鬱而未及施者發之子吁嗟龔公藏魄於此

明故安慶教授贈承德郎吏部驗封清吏司


主事城山梅公洎配贈安人張氏合墓墓

誌銘

梅贈公宣城之賢者張安人其配也子南昌令某建寧貳守某吏部稽勳郎某孝廉某韓鄂之盛倍平輿而半潁川海內艷其家聲輒原本贈公安人之教以爲自燕山而後則今宣城矣贈公安人歿且塋南昌兄弟造余某手狀而徵銘余同吏部舉南宮而南昌余薦士也於梅世講其敢辭按狀梅自五代時有祖曰遠椽宣城遂家焉其居文春山則自宋尚書詢之弟誠始誠十六傳而生榮宗榮

宗生珍珍生椽椽英邁豪爽以貲爲藩王府典膳娶於佘生七子其第五爲贈公公諱繼善字幼孜別號城山官教授其贈承德郎吏部驗封司主事洎張安人則吏部若繇戶部改驗封滿主事考之以也公弱不好弄初就傅卽孳孳嗜學嘉靖年爲學官弟子戊戌娶張安人公孝謹而安人婉婉善中饋其事典膳公佘孺人一羹一葢安人手烹調而公愉色而進之兩尊人之爲舉匕箸視他子舍有加焉兩尊人病公與安人不離側蓋佘孺人彌留猶張目視安人呼曰孝婦孝婦云兩尊人歿伏

臘忌諱祭薦蠲腆如其生存即久矣譚及遺言遺事公未嘗不泫然涕下廼安人亦每恨其為婦遲而尊章之養猶有未展也受所遺田廬獨甘荒頓有薛包風宣城人無不多公孝友者屢試高等顧大比則數困不利嘉靖甲子竟用貢上春官投牒乞教職太宰虞坡楊公憐其才勉留之而公自以數奇愛廣文之雍容樂就馬戊辰授贛州訓導癸酉擢宜都教諭乙亥擢安慶教授所至與諸生劇切惟禔躬飭行為諄諄而一本之身範非貌言者監司署其考云以律人者律已以教子者教人其在贛州中丞李公使課士謂公曰士先器識後文藝吾為士擇師非公不可耳當是時南昌建寧君業已舉于鄉公獨以道立教行受當道知棲遲博士之席者十餘年而始投劾歸萬曆戊寅歲也歸益課諸子讀曰儒家舍讀無業耳乃吏部君弱而銳矻矻窮晝夜不休公顧謂曰古人嚴立課程寬著意思夫學亦無庸太苦尅為也南昌君與計偕數躋數寬之曰農人蔗菜雖有水旱必有豐年俟馬可矣惟是居恒戒馬汝曹立身第求不欺不愧寧拙無巧寧鈍毋銳世有逢衣博帶而裂名毀檢



李文會集卷三
寧死不願子孫有此行也及南昌兄弟次第掇科名則時時醮曰上不負天子下不負所學不負二字最須體驗卽安人處閣中聞某官廉某官仁則曰兒效之聞某婪虐則曰兒鑒之其教如此公貌不勝衣言不出口平生無嗔恚於人人亦無嗔恚公者與人質產輒倍其直曰彼貧也當厚售有竊公茶獲之懼而求償公曰彼貧也所擷幾何并所獲茶與之歲凶穀翔貴出廩平糴更於正量外加數溢曰恨力薄不能賑忍徼利乎公居宜都兩蒼頭竊公贏金亡去及公致仕各以貲賈立田宅宜

都會尹宜都者公故人也自以書抵公請爲公案責之公謝曰亾久矣不敢煩故人公故長者而安人慈祥好賑卹施藥甕道持齋戒殺崇信西方之教自其爲婦以至爲母不惟棟家教子婚祭賓客公賦之輸納田廬之修飭所爲公拮据甚辦而警慧解事知大義亦時能出計慮佐公有奴陳者潛勾一奴盜貲事覺適病歿陳氏挾而要公橫甚諸梅不能平咸從與公訟治之安人止公謂此信然者實以不肖之心來可善遣也獸窮則噬治將益甚安人爲具酒食令饜足徐迺譬曉之諸姦愧謝

去故公晚常追念曰如某年某事微若言吾幾失之每以安人爲益友云郡守襄陽鄭公識公於安慶公旣歸鄭公時過存之鄉飲以爲大賓數遜鄭公固請曰吾固知公意也蓋鄉飲之濫久矣吾豈以鄉飲爲公重實欲借公重鄉飲耳公不得已爲疆出蓋賓於鄉者三焉自是以吾衰爲解郡邑大夫莫能致惟杜門與安人日含飴弄孫卽諸子仕進往返不以闕其念矣南昌君筮仕魏縣迎公安人于邸壬辰七月十五日公歿喪歸越明年癸巳正月十四日安人繼歿公疾革據床吟曰美人何

處在明月萬山頭畧無怛化意而安人將終指其心謂諸子曰此不可欺孺子識之於乎是可以見公與安人矣公生正德癸酉十一月某日距卒享年八十安人生正德辛巳十月某日距卒享年七十有三子男四某巳丑進士娶郭氏某丙子舉人娶某氏某丙戌進士娶萬氏某乙酉舉人娶某氏銘曰宣城之梅來自五季蕃衍奕葉隱德不試至于城山蔚爲經笥十載師儒三方鼓吹亡不責償糴以市義胙篋可容侮予何患亦有淑媛侔德齊懿樹蕙滋蘭共莖並蒂入爲望郎出爲循吏古

稱善慶公益昌熾佳哉斯城雙壁同竈斧如堂如
千秋永闕

郭太恭人黃氏墓志銘

郭母黃太恭人者御史大夫哲卿母也太恭人卒
于萬曆庚子四月二十三日計聞 上爲按甲令
道守臣卽凡筵 諭祭並祭贈公有偕嘉耦于采
蘋啓後人于式穀之語稱渥典已先是贈公與元
配趙孺人葬鐵竈山已三十餘禩哲卿迺別卜于
維陽橋北山兜之原負甲揖庚以壬寅二月二十
一日奉太恭人厝焉而持見鵬翁君所爲狀徵銘

於余余病矣然哲卿余友也而請甚勤安忍辭按
狀太恭人惠安縣後蔡鄉處士黃德佩女其歸贈
中丞實軒公也公家計稍絀矣而性孝友憐貧好
施與伯氏比屋居太恭人朝夕佐贈公事兄若嫂
者若而年婉婉和輯辱無反者其佐贈公爲二親
窀穸凡百之費伯氏五之贈公十之至人有緩急
蹙蹙爲仁則太恭人輒黽勉其間有亾不計也趙
孺人生二女一子太恭人視猶已出鞠育婚嫁有
鳴鳩之風焉迨嘉靖季贈公移惠安依中表居月
餘忽心動亟歸而倭至中表爲殲贈公獲以家免

李文簡集卷五
人曰德報也或曰是將有後福者然自是益困無
何贈公歿錡粟不繼太恭人母子每相持泣而今
哲卿出就傳攻書卽孤寒斬然見頭角里中父老
已有拊其頂竒之者旣爲諸生受廩領鄉書廼爲
破涕解頰且勉之曰而翁之沕而章也而門之微
而大也是在孺子矣哲卿成進士令清江太恭人
就養宦邸每趣哲卿蚤視事見哲卿廉白也而喜
但聞答朴則愀然不樂時有監司踪跡郡節推謂
清江令無私且同里密屬之太恭人誠曰廉訪非
令職也推府上官謗缺當諱護卽貴人我故里不

可令有失厚之累太恭人雖糾組流顧明達大體
如習爲吏者哲卿爲南臺御史以請用故逐臣言
江陵奪情者謫丞江山無何 召還御史居一歲
復以諫 內操左遷廷尉評太恭人不色愠曰御
史宜爾也其官南臺出之江山復入南臺遷棘寺
擢考功太恭人皆從迨擢符丞謝曰未亾人就養
多年今老矣兒第自往吾不欲行也歸則督孫婦
理家政蚤作夜寐猶如少婦時每歲時祭祀錡釜
之事必躬必腆族鄰中姻者喪者饑寒者竭屨應
之謂是無亾贈公志也居恒淡素翟冠霞帔歲不

再御澣衣蔬食卽尺帛寸縷滯穗遺稅無不受嗇
每諸孫諸婦侍側輒爲言贈公隱德及涼約時狀
曰不積善何以有今日貧賤其可忘乎今華門圭
竇之人一旦繁華梁肉統綺狼戾屑越猶嗛不知
足曾不念疇昔起家何如在縉紳猶然何論閭閻
古人有言安得登枝而捐其本若太恭人貴而能
思豐不忘約足以勵世矣哲卿之爲循吏爲名御
史爲考功主留計而人無後言撫楚而所節省無
算楚人至今思之官居副臺環驄列豸凜然持三
尺爲之表率天下望想其丰裁然而身若不勝衣

言若不出口謙冲質樸逡逡然不異諸生固其天
性哉木之枝葉必類其本亦得之母儀者多也初
哲卿清江秩滿贈實軒公如其官太恭人封太孺
人及爲御史壬午 覃恩贈贈公御史趙孺人太
恭人仍故封及中丞秩滿迺進贈公中丞而太恭
人進今封云銘曰 詩詠瓜瓞老喻張弓天作恭
人以昨郭宗相彼有道生此令公楨時榦國樹駿
流鴻孰滋而太孰累而崇曰贈君德曰阿母功維
水泱泱北山葱葱玄扃黃壤馬鬣其封我銘于幽
以告無窮

南京國子監祭酒諡文莊虛齋蔡先生副室

丁氏夫人墓志銘

丁氏夫人者蔡文莊公副室東莞知縣存微太僕寺寺丞存遠兩公之母也丁在邑南陬故衣冠鉅族兩公既貴卽今蔡氏曾玄若尋甸守如川君輩若干人什九丁出海內以文莊公爲先賢往哲愛重其後裔而遡所繇蕃衍輒稱丁夫人云文莊公娶胡氏封安人有心疾乃納丁夫人以佐之丁夫人生天順甲申七月初六日卒嘉靖壬寅十二月二十六日迄今六十年往矣世代寥邈子孫已不

能詳其狀然某徐考其生後文莊公十一年其歸以成化丁未蓋年二十四當文莊公登第後移告之日旣而授禮部改吏部丁內艱復除禮部乞改南吏部乞終養丁外艱服除卽家拜江西按察副使督學年餘致仕家居一年爲正德戊辰起南祭酒而文莊公卒卒後壬寅而丁夫人始捐館舍也蓋事文莊公二十二年而爲母稱太君者三十五年余聞夫人性慧知書善中饋文莊公弱而苦心經史晝思宵得亟記疾書丁夫人常爲檢筆扎篝燈火時造嘉飲食而進之文莊公生平雅操邃養

出處之際如鳳舉鴻冥一介不苟取而義所當爲
不復自計改墓其先之不意慊者凡四世衣食婚
斂其總功近屬之貧窶又若干人蓋亦有拮据相
助于內者而太僕東莞兩公皆文莊公歿後績學
成名聯翩而起母教可知也文莊公五子存畏安
人出弘治戊午舉人年十九而歿存素副室莊出
存微存遠存警皆丁出微嘉靖乙酉舉人遠嘉靖
丙戌進士警庠生其子孫最多其仕者萬曆癸酉
舉人尋甸守如川其諸生承大承一岳從祖習祖
學川震得丕烈應曾紹曾穉圭玄圭念高其餘及
非丁出者不能悉書先是正德壬申葬文莊公後
渚山背坤面艮而右爲丁夫人壙今萬曆壬寅十
月二十二日諸孫始奉柩厝焉而徵銘於余余方
病告屏居顧一念景仰文莊公而丁夫人壬寅卒
今壬寅葬余乃壬寅生若有數者爲之銘銘曰
予疆于彌衣韜于裏巍巍文莊有相其美鵬不字
鸞棘不葅桂繩繩子孫有錫其類鼎顛而利驥附
而顯矐彼小星有煒彤管前壬寅歿今壬寅柩問
爾來何暮曰俟李子銘吾墓

兵部主事豐源蕭公墓志銘

李文節集卷二十一
豐源蕭公汝芳字斯妍先世江西泰和人洪武中
有蕭官泰者應詔徙遼東鐵嶺衛遂家遼東爲公
六世祖官泰生文文生銘銘生永福仕祁州訓導
永福生鳳雛貢入太學不仕爲公父娶傅氏以嘉
靖癸丑五月初七日生公年十七補弟子員隆慶
壬申 穆廟升遐公哀服哭三日同舍生以爲迂
笑之公若不聞時甫弱冠青衿而器識卓然不凡
如此性真誠明爽不設城府修邊幅一切機心機
事不存于胸中其讀書不專爲記誦詞章之學謂
聖賢經傳言言可行議論蹈履一以聖賢爲法遼

人如稱曰蕭古實已更曰蕭道學然公道學出于
古實非遊談飾虛以欺世盜名言行不相顧者比
也事父母晨昏定省疾侍湯藥衣不解帶父母不
食公不食持喪致哀動如曲禮與弟析箸畀以腴
田及亾其田又以已田畀之賜其從兄如弟婚嫁
其子女如子至宗黨無親疎饑與粟寒與絮喪與
槨屨勉赴之不皇計有亾也萬曆某年掄貢入太
學已卯舉京闈癸未與余同舉進士同出紫溪蘇
先生之門又同臭味驩若平生每相見無寒溫語
亦不作矜莊色坦如也怡如也疎而不漏卽醵金

諸同年率封識唯謹公獨否及驗之乃過于封識者他事類此既而請告歸乙酉赴銓得涇陽時少宰涇陽人公謁少宰私第白少宰曰令卑官然幸叨先生大邑願假體貌俾有顏色於吏民少宰不悅公語余余亦不謂是然心折之知公蓋無畏高明者涇陽多豪右公下車出令有席權怙勢螫吾赤子者法不貫扶弱抑彊豪右側目而未有以中會歲大祲公停徵息訟出倉粟帑金賑不繼則行勸分於邑之素封及大賈得若干緡委者爲饘粥躬自省巡猾胥不得染指而後其壯者疏久涇故

渠頗用古救荒之法所全活無筭而豪右因以蜚語入中丞檄徐兵憲按之徐出公不意猝至縣檢稽出入纖毫不爽已又閱公費籍歲纔三百金減前令十之七八乃歎曰異哉涇陽之人謂夷爲混一至此乎進公揖之有加禮還報中丞白見涇陽令廉狀而中丞先入中距竟論降當公入覲故事率取贖緩爲資斧左右以請公曰古人一介不取一介不與吾無與也取將焉用及至京謁諸貴遊投刺而已丁亥公歸尋丁內外艱已絕意仕進而人言公真儒可大用餘姚太宰雅知公名癸巳服

李公文集卷三十一
三十一
闕起代州判官未赴遷長治令甲午擢廷評無何
擢駕部時島夷侵朝鮮講封貢公極言不可而又
爲余言遼將某子甲智勇有戰功爲人所掩廼論
戍余謂公遼人且駕部何嘿嘿爲公謂大司馬不
相信言無益也丙申公復請告余自此遂別公癸
卯秋北畿缺銓曹余以遼試附畿闈因想及公而
同羊江夏公更愆慙之曰達視所舉余遂以公名
移太宰彙上得簡用衆稱得人而畿內士以籍爭
竟易之余疏自引過然以爲過在籍不在人且度
必不出彼遺榮避世以遼爲未足去之六七舍而

棲於所謂鳳凰山者此豈知有好爵而欲就焉者
哉鳳凰翔于千仞微獨衆人卽余亦淺之乎視公
者特將借此舉以彰熙盛時上有弓旌下有巢許
耳蓋自丙申一別絕不相聞問而公遂以乙巳六
月二十八日謝世享年僅五十有三用不究才壽
不稱德惜哉公配張氏子二文中黃中皆生員文
中等將以丙午五月六日葬公于某山走人持職
方葉公所爲狀請銘於余余何忍辭銘曰 王文
成公有言功利之毒入於人之心髓如波斯頽中
流孰砥宇宙茫茫遼陽蕭氏見細德之險微遺浮

榮以脫屣彼鳳凰之高翔詎矰繳之能擬勃海冲
融醫閭喂哺身歿名立同流並峙王烈管寧後先
一揆誰銘其幽南宮李子

春江潘公墓志銘

余與潘贈公生同里方余年十二三與里中髫髻
爲文社公卽翹然稱雋才嘉靖戊午同讀書于張
園數月無何兵燹里居蕩折吾兩人猶時時相從
及余與計偕每過公輒出已與子姓文命余訂正
壺飡相勞坐久景移公不余舍余亦不能舍公萬
曆己丑稽勳君上春官公與俱來余每下榻延公

夜談達旦如是者又數月及甲午余典試南畿而
公以太學生就試撤棘後余招公遊牛首共寢臥
貢院中至子夜公斃余誦所試文琅琅意猶甚得
余笑謂曰使兄入彀稱門生遂遂寧復敢同榻邪
院中人見其與試官同寢臥驚異之余語之故且
曰太公也爾等呼太公勿呼相公一時南都人以
爲奇談及庚子余貳南銓公部試余持公卷視趙
太宰公太宰公嘉其壯見其文瞻而善書寘高等
旣落第尚徘徊南中余招至邸舍下榻如薊門然
不能夜談而公夜頻起患脾泄矣抵家遂病數月

而歿癸卯夏余行稽勳君以墓銘請甲辰秋復來
趣曰日月有期待此以寃安卽叔一切謝絕然吾
父垂歿之託叔不銘吾父誰當銘者嗟乎余其忍
辭公諱維城字光宗號春江潘故名族世居筍江
之西市祖真叟公某嘗還遺金父南浦公某割股
事兄以侍御登南公貴封南京江西道監察御史
生子六人長澄江公今戶部君瀾父次侍御公公
爲季自幼從侍御公學所受書悉侍御公手注口
授其治博士家言侍御公多取先輩一二名家令
向墓而字擬之賞瑜摘瑕鐫督過嚴師而公刻礪

鑽研更好與魁人名士相約結博交頻課孜孜如
不及誦讀恒至夜分酷嗜三蘇所爲文克然沛然
若不經思索者辛酉入邑庠庚午食廩癸巳貢入
太學鄉試八畿試三稽勳君滿秩當封公却不就
曰一生辛苦亦欲監尺寸兒姑榮而母耳於是稽
勳君封母宜人而公猶諸生應試或謂潘太公不
善自娛跋涉數千里三晝夜棘闈何苦乃爾公不
答也每念兩兄老矣暇卽爲治甘肫選絲竹有無
幾相見之感然恭謹齋遯不異童稚時其教子姪
如侍御公每見甚肅而常以祠堂祭田爲念一日

對余責望稽勳君余謂郎君清白且有待公曰水木本源烝嘗爲大吾欲孺子亟成吾志耳公銳精進取屈首蓬牕當侍御公敷歷南北而人不知公爲侍御之弟稽勳始以工部權闕武林公自京還過之逾月而行語不及家其家居郡邑大夫欲見之不能得而性慈好施每割廩橐賑窮交卹及孤久而不勅嘗食餓者於江干路遇乞兒輒出袖中青蚨與之至彌留語稽勳君曰貧賤好修何必富貴富貴不仁不如貧賤公蓋志仁者惜其以明經老不獲有所爲然哲嗣勅興巍科華貫不可謂

非仁人之報矣蓋公旣歿而稽勳君始請於朝得贈公如其官云公享年六十四宜人尚寶司卿郭公立彥女墓在維陽橋北霞美山之原以某月日塋銘曰 封可榮也而弗屑擔可弛也而弗輟胡砭砭一生而空斃躡注固有挹通必有閉爾跋爾躡嗣迺奔軼霞山蜿壇而鬱結翠如之丘蘭桂茁我銘其幽長不滅

明故御馬監大監仰山賈公墓志銘

公諱進忠字思盡號仰山河間獻縣人父天周母沈氏以嘉靖丁未年九月初八日生公公自少警

敏通書曉大義壬戌進宮御馬監趙公愛之隆慶
壬申擢侍乾清宮 賜牌帽累秩內官監給飛魚
象龍斗牛等服司禮張公宏知公可任舉家棟授
之馮璫敗諸中涓多所波及獨不及公萬曆癸未
以疾辭出司景恭王寢園徜徉山水間者十四載
文書房徐公守福聞公不負張又屬公家棟及徐
歿爲經紀維持人無得囂凌攫攘以公在焉庚子
調御馬監兼草欄出納辛丑 賜近侍六人癸卯
以公善奕 命誨奕於宮中每隻日一進雖以藝
事周旋掖庭必莊必飭儼然過人間外傳也 賜

玉帶偶以微節褫旋復予之余嘗弔徐公公爲執
喪稽顙謝余旣復詣余謝自是或以食物餉余受
不報而重犒其使人一日造余邸謂余蒼頭曰今
人見佛而禮拜供養何求於佛亦敬佛耳吾以而
主公佛地中人効一芹之敬而所犒輒浮於吾所
餉豈以吾爲有求乎及見余則自言其雅與賢士
大夫交游因舉兩宗伯臨胸馮公交河余公御史
中丞吉水郭公舊京北渭南孫公皆相禮重而京
北獎以朝野推賢之額皆以其無求也余旣入閣
公一日造余邸令蒼頭啓視內房及庖舍見其蕭

然大息而去戒蒼頭勿言既而余質公屋有以爲
言者公咲曰吾屬居停士大夫往往有所請求邀
厚利士大夫亦利其無餽費也而處焉今相公質
屋而吾受其質此非利交明甚言何傷哉余既告
休不得去移居真武廟公來省余爲余娓娓譚攝
生之術甚辨至溫室樹從來余不敢問公亦不言
一日書酒色財氣長歌持來黏之壁有云塲中傀
儡爲誰忙又云混沌不分誰是我又云無去無來
夢一場似於塵緣有勘破者已而曰他日相公其
爲我書數語蓋公知其將捐世豫以墓文屬余矣

別去遂病病篤猶料理其身後事微密周匝如平
時彌留不亂以辛亥十一月某日歿距生年六十
有五公弟進孝錦衣衛理刑千戶進科河間府庠
生進禮鴻臚寺序班從弟進從子志誼保定騎
營遊擊與其徒竇韓郝周輩將以壬子年某月日
奉公之喪歸葬獻縣單家橋之原負陰抱陽而請
銘於余余念公豫屬不忍辭也爲之銘銘曰 巷
伯其儔獨好與賢士大夫遊澹然何求愛名而好
修依稀乎其儒流藏于茲丘我銘其幽

李文節集

卷二十一

三

